

Erich Bolinius

www.erichbolinius.de

Erich.Bolinus@t-online.de

Bericht über den BSV Kickers Emden - Sendung „Flutlicht“ auf Radio Ostfriesland

Donnerstag, 1.11.2012 18.05 Uhr auf 94.0 bzw. 87,7

Leev Toehörers,

Kickers Emden hett lesd Wekenenn mit 1:0 tegen Union Lohne wunnen. Dat was 'n fuul Sieg, hett Kickers Trainer **Yasin Turan** na dat Spöl seggt. Aber wat sall't. Wunnen is wunnen. Un blot de Punkten tellen. Un dorvan hett Kickers in de Landesliga nu al 22! Well harr dat docht?

Na 'n paar Week kunn Turan ennelk weer **Bernd Grotlüschen** insetten, dit Maal in de Spitze. Up de recht Flögel störmte **Tobias Bruns**, de de Trainer för **Christopher Appeldorn** spölen leet. **Carlos Santos da Luz** spölte för **Denis Alexandrenko** in 't Middelfeld. Anners blev dat bi di Upstellen, so as tegen Dodesheide een Week vörher. Of he Alexandrenko neet upstellte, wall de an de Dag 25 Jahr old wurr, weet ik neet. Weet aber, dat de hele Mannskupp na dat Spöl bi hum up Geburtsdag in de Keller van de Emder Ruderverein was un dor bit smörgens um söven fiert hett. Dat harren de Jungs ok verdeent, meen ik.

Man nu toe dat Spöl. Anfangs kwamm Kickers Emden neet so recht in 't Spöl.

De Binnenachtermannskupp mit **Gökay Batbay** und **Milat Faquiryar** mook 'n unseker Indruck. Kickers kunn blied wesen, dat de Lohner **Thomas Müller** in de 20. Menüte 'n Freetrapp an de Querlatt dönnerte. Ok de Lohner **Sven Foppe** mook dat in de 34. Menüte neet beter. He versöchte de Ball over de goed, an disse Dag stark hollende Kickers Torwart **Karsten Buss** toe lupfen, man dat klappte neet. Ok bi 'n skarp Skoet van de sülvige Spöler in de 38. Menüte was Buss toe Stee un hull prachteg.

Mit 0:0 gung dat in de Halvtiedpaus. Na de Paus kwamm Kickers Emden völ beter in 't Spöl. 'n paar Menüten dorna knallte **Sebastian Bloem** 'n Ball ut 'n paar Meter over dat Lohner Tor. De van de Lohner **Christian Stover** an **Santos da Luz** verskullende Elfer verskoot **Thilko Boekhoff**, Torwart **Tim Meiners** hull de Ball.

Kickers Emden drückte nu, man aber ok Union Lohne kwamm toe goed Kansen. De grootste harr de Lohner **Steffen Hilberink**, de dat Kunststück klaar broch, de Ball ut 5 Meter an 't Tor vörbi toe sketen. „Dat was 1000prozentige Kans“, see Unions Lohnes Trainer **Hardy Stricker** na dat Spöl.

Dree Menüten vör dat Spöleenn dann dat Siegtor vör Kickers Emden. Na 'n Freetrapp van da Luz van rechts, hull de egentlik neet goed stahnde **Ayaovie Bamezon** einfach de Foet in de Skoet – un sien Bogenlamp landte genau in de linke Winkel. De veer mitgereisten Kickers-Fans reten genauso de Arms in de Höchte, as de Spölers un Trainers. Un ok de Kickersfan, de eerst 'n paar Menüten dorbi was. He harr sük versehn, was na Blau-Weiß Lohne bi Oldenbörg fahren, un de Platz liggt ruugweg 100 Kilometer van Union Lohnes hörs of. Aber moi, dat he doch noch komen is.

Nadem de Schiri offleit harr, is Kickers-Torwart **Manfred Wehe** so gau over de hele Platz na Torwart Buss lopen, um hum toe graleren un oftodutjen. Ik hebb Manni noch noit so gau lopen sehn.

Trainer Stricker van Union Lohne see in de Pressekonferenz, wat **Jürgen Wegmann** 1987 maal na 'n Spöl, as he mit Bayern München verloren harr, seggt hett: ***Eerst harren wi keen Glück, un dann kwamm ok noch Pech dortoe.***

Mörgen spölt Kickers nu um Klock acht tegen de Tabellenföhrer VFL Oldenbörg in `t Oostfreesland Stadion. Hopentlik komen Bült Toekiekers. De Mannskupp hett dat verdeent.

So, nu noch as alltied noch ´n kört Foetballwitz, dit maal weer ut Schottland, wor ik ja körtens mit mien Mannskupp west bün:

In Schottland is ´n groot Foetballturnier. De Sieger kriggt ´n Pokal, de twee Platzeerte bekummt ´n Geldpries. Dat Endspöl geiht in de 90. Menüte – mit ´n Egentor – toe Enn.

Leev Toehörers van Radio Oostfreesland,
dat was dat weer maal för disse Week.

Ik hoop, Joe hett dat Plattdüütsk gefallen, denn mien Motto heet ja alltied,
plattdüütsk dürt - nettso as Kickers Emden – neet unnergahn.

Bit anner Maal

Joe

Erich Bolinius

ut Emden-Petjem (Petkum).